

VENDIM
Nr. 41, datë 11.3.2019

**PËR DHËNIEN E MANDATIT TË DEPUTETIT TË KUVENDIT TË SHQIPËRISË,
KANDIDATIT TË LISTËS SHUMEMËRORE TË PARTISË DEMOKRATIKE, QARKU
BERAT, PËR PLOTËSIMIN E VAKANCËS SË NJOFTUAR NGA KUVENDI
I SHQIPËRISË**

Komisioni Qendror i Zgjedhjeve, në mbledhjen e datës 11.3.2019, me pjesëmarrjen e:

Klement Zguri	kryetar;
Denar Biba	zv.kryetar;
Bledar Skënderi	anëtar;
Edlira Jorgaqi	anëtare;
Rezarta Bitri	anëtare;

shqyrtoi çështjen me:

OBJEKT: Për dhënien e mandatit të deputetit të Kuvendit të Shqipërisë, kandidatit të listës shumëmemërore të Partisë Demokratike, qarku Berat, për plotësimin e vakancës së njoftuar nga Kuvendi i Shqipërisë, pas dorëheqjes nga mandati i deputetit, z. Astrit Veliaj.

KËRKUES: Kuvendi i Republikës së Shqipërisë.

BAZA LIGJORE: neni 23, pika 1, germa “a”, neni 164, neni 175, pika 2, i ligjit nr. 10019, datë 29.12.2008, “Kodi Zgjedhor i Republikës së Shqipërisë”, i ndryshuar.

Komisioni Qendror i Zgjedhjeve pasi shqyrtoi dokumentacionin e paraqitur dhe dëgjoi diskutimet e përfaqësuesve të partive politike,

VËREN:

Nëpërmjet shkresës nr. 746/2 prot., datë 25.2.2019, drejtuar Komisionit Qendror të Zgjedhjeve, Sekretari i Përgjithshëm i Kuvendit, z. Genci Gjonçaj njofton krijimin e vakancës në Kuvendin e Shqipërisë, për shkak të përfundimit të parakohshëm të mandatit të deputetit z. Astrit Ferik Veliaj, deputet i zonës zgjedhore, qarku Berat.

Neni 164 i Kodit Zgjedhor përcakton se në rast të ndërprerjes së mandatit të deputetit, Kuvendi njofton Komisionin Qendror të Zgjedhjeve, për krijimin e vakancës në Kuvendin e Shqipërisë dhe Komisioni Qendror i Zgjedhjeve merr vendim për dhënien e mandatit, kandidatit të radhës në listën shumëmemërore, të së njëjtës parti politike në zonën zgjedhore përkatëse, regjistruar sipas nenit 67 të Kodit Zgjedhor.

Komisioni Qendror i Zgjedhjeve, me vendimin nr. 555, datë 26.7.2017, shpalli rezultatin përfundimtar të zgjedhjeve për Kuvendin e Shqipërisë, datë 25.6.2017, si dhe miratoi listën emërore të deputetëve të zgjedhur për çdo subjekt për çdo zonë zgjedhore. Sipas vendimit të sipërcituar, Partia Demokratike për zonën zgjedhore qarku Berat, për zgjedhjet për Kuvendin e Shqipërisë, të datës 25 qershor 2017, ka fituar 1 (një) mandat dhe kandidati fitues nga lista shumëmemërore e Partisë Demokratike, qarku Berat, është numri rendor 1 (një) z. Eduard Ismail Halimi.

Pas njoftimit nga Kuvendi për krijimin e vakancës për shkak të heqjes dorë nga mandati i deputetit të Kuvendit të Shqipërisë të z. Eduard Ismail Halimi, deputet i zonës zgjedhore qarku Berat, Komisioni Qendror i Zgjedhjeve, me vendimin nr. 10, datë 19.2.2018, i ka dhënë mandatin e deputetit të Kuvendit të Republikës së Shqipërisë z. Astrit Ferik Veliaj.

Rezulton se lista shumëmemërore e Partisë Demokratike, qarku Berat, nuk i plotëson të gjitha kriteret e përcaktuara në nenin 67 të Kodit Zgjedhor, duke përfshirë dhe kriterin e gjinisë, duke mos pasur një në tre emrat e parë kandidat nga secila gjini, si dhe duke mos pasur tridhjetë për qind të listës shumëmemërore nga secila gjini. KQZ-ja, me vendimin nr. 566, datë 5.10.2017, vendosi

sanksionin administrativ gjobë në masën 12.000.000 (dymbëdhjetë) milionë lekë ndaj Partisë Demokratike.

Në bazë të nenit 175, pika 2, të Kodit Zgjedhor, KQZ-ja, në rast vakance të krijuar në mandatet e fituara nga lista shumemërore e Partisë Demokratike, në zonën zgjedhore qarku Berat duhet të zbatonte dhe sanksionin plotësues, duke zëvendësuar vakancën e krijuar me kandidatin e radhës nga gjinia më pak e përfaqësuar.

KQZ-ja, me vendimin nr. 338, datë 30.5.2017, “Për miratimin e listave shumemërore të Partisë Demokratike, për zgjedhjet për Kuvendin e Shqipërisë 2017”, ka miratuar listën shumemërore të Partisë Demokratike për 12 zonat zgjedhore, së bashku me *deklaratat model 03*, për vendet sipas kuotës gjinore të listës shumemërore për çdo zonë zgjedhore.

Sipas *deklaratës model 03*, rezulton se gjinia femërore, si gjinia më pak e përfaqësuar në listën shumemërore qarku Berat pas dorëheqjes së znj. Juvina Fejzi Jani dhe znj. Monika Asqeri Qosja ka shteruar. Në mbështetje të nenit 164, pika 2 (fjalë e fundit), duke qenë se lista e gjinisë femërore ka shteruar, KQZ-ja nuk mund të zbatojë sanksionin plotësues për shkak të ezaurimit të procedurës administrative për vendimin nr. 10, datë 19.2.2018, mbi dhënien e mandatit të deputetit të Kuvendit të Republikës së Shqipërisë z. Astrit Ferik Veliaj.

Për sa më sipër, mandati i ndërprerë duhet t’i kalojë kandidatit vijues të listës shumemërore të Partisë Demokratike, të zonës zgjedhore qarku Berat, të cilit i kalon mandati i deputetit, është kandidati për deputet me numër rendor 3 (tre), z. Lefter Novruz Maliqi.

Referuar nenit 11, të ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”, vetëdeklarimi dhe verifikimi i kushteve të të dhënave në përputhje me këtë ligj, kryhet për çdo kandidat të listës shumemërore për zgjedhjet pararendëse, për Kuvendin e Shqipërisë, të cilit i takon të marrë mandatin e deputetit për vendin vakant, sipas Kodit Zgjedhor.

Z. Lefter Novruz Maliqi, referuar ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”, ka depozituar në Komisionin Qendror të Zgjedhjeve më datë 4.3.2019, formularin e vetëdeklarimit me numër unik 2109.

Nga verifikimi i të dhënave në formularin e vetëdeklarimit, të z. Lefter Novruz Maliqi, rezulton se: nuk ka deklaruar dënime penale, masa sigurimi personal, urdhër kërkimi ndërkombëtar, dëbime.

Z. Lefter Novruz Maliqi më datë 27.5.2017 ka dorëzuar formularin e vetëdeklarimit me numër unik PD-03-BR si kandidat i listës shumemërore të subjektit politik Partia Demokratike për zgjedhjet e datës 25.6.2017 për Kuvendin e Shqipërisë. Me shkresën nr. 3537 prot., datë 30.5.2017, është kërkuar informacion pranë zyrës së Gjendjes Gjyqësore dhe me shkresën nr. 3540 prot., datë 30.5.2017, në lidhje me kandidatët e listës shumemërore të subjektit politik Partia Demokratike. Me shkresën nr. 3537/1 prot., datë 1.6.2017 prot., të Drejtorisë së Përgjithshme të Burgjeve rezulton se z. Lefter Novruz Maliqi është i padënuar nga gjykatat shqiptare. Me shkresën nr. 3540/1 prot. datë 6.7.2017, Drejtoria e Përgjithshme e Gjendjes Civile, mbi verifikimin e listës shumemërore të kandidatëve për deputetë të subjektit politik Partia Demokratike, njofton se subjekti ka këto ndryshime në gjenealitetet e mëparshme, të padeklaruara në formularët e vetëdeklarimit:

Mbiemrin e ka ndryshuar nga “Brisku” në “Maliqi” dhe datëlindja nga “10.9.1972” bëhet në “10.2.1972”.

Të dhënat e evidentuara në të dy formularët e vetëdeklarimit janë të njëjta dhe nuk kanë ndryshime. KQZ-ja, me vendimin nr. 338, datë 30.5.2017, ka miratuar listën shumemërore të Partisë Demokratike për zgjedhjet për Kuvendin e datës 25.6.2017, ku rezulton se: z. Lefter Novruz Maliqi, është kandidati i kësaj liste me numrin rendor numër 3 (tre) qarku Berat.

Me shkresën nr. 1353 prot., datë 7.3.2019 z. Lefter Maliqi ka dorëzuar formularin e vetëdeklarimit të korrigjuar shoqëruar me një sqarim ku ka deklaruar se nuk ka pasur dijeni për ndryshimet e bëra

nga prindërit e tij në kohën kur ka qenë i mitur.

Në zbatim të ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”, dhe kreut V, pika 2, germa “b” dhe pikës 3, germa “c”, të vendimit të Kuvendit nr. 17/2016, “Për përcaktimin e rregullave të detajuara mbi zbatimin e ndalimeve të parashikuara në ligjin nr. 138/2015”, Komisioni Qendror i Zgjedhjeve, me shkresën nr. 1027 prot., datë 4.3.2019, ka kërkuar informacion nga zyra e Gjendjes Civile dhe me shkresën nr. 1026 prot., datë 4.3.2019, dhe nr. 1298 prot., datë 5.3.2019, ka kërkuar informacion nga zyra e Gjendjes Gjyqësore, për kandidatin për deputet, qarku Berat, për Kuvendin e Shqipërisë, z. Lefter Novruz Maliqi.

KQZ-ja, gjithashtu, ka bërë publikimin e formularit të vetëdeklarimit në faqen zyrtare të internetit.

Me shkresat nr. V-679/1 prot., datë 4.3.2019 dhe nr. V-692/1 prot., datë 7.3.2019, zyra e Gjendjes Gjyqësore ka dërguar në Komisionin Qendror të Zgjedhjeve, verifikimin e gjendjes gjyqësore për kandidatin për deputet, qarku Berat, për Kuvendin e Shqipërisë, z. Lefter Novruz Maliqi, me gjenealitetet e deklaruara dhe ato të ndryshuara, sipas të cilave rezultoi se është i padënuar nga gjykatat shqiptare.

Drejtoria e Përgjithshme e Gjendjes Civile nuk i ka kthyer ende përgjigje kërkesës sonë.

Nga verifikimi i të dhënave në formularin e vetëdeklarimit të z. Lefter Novruz Maliqi, rezultoi se nuk është deklaruar asnjë e dhënë që ka të bëjë me kushtet e ndalimit të zgjedhjes në funksionin e deputetit, sipas ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”.

Për sa më sipër, mandati i ndërprerë i përket kandidatit vijues i listës shumëmemërore të Partisë Demokratike në zonën zgjedhore qarku Berat, i renditur me numër rendor 3 (tre), z. Lefter Novruz Maliqi.

PËR KËTO ARSYE,

Komisioni Qendror i Zgjedhjeve, mbështetur në nenin 23, pika 1, germa “a”, neni 164, pika 2 dhe nenin 175, pika 2, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, i ndryshuar,

VENDOSI:

1. T’i japë mandatin e deputetit të Kuvendit të Republikës së Shqipërisë, kandidatit të radhës në listën shumëmemërore të Partisë Demokratike, qarku Berat, z. Lefter Novruz Maliqi.

2. Ky vendim hyn në fuqi menjëherë dhe botohet në Fletoren Zyrtare.

3. Kundër këtij vendimi mund të bëhet ankim në Kolegjin Zgjedhor, pranë Gjykatës së Apelit Tiranë, brenda 5 (ditë) ditëve nga shpallja e këtij vendimi.

KRYETARI
Klement Zguri